

四庫全書

集部

欽定四庫全書

集部

忠肅集卷下

詳校官庶吉士臣陳若霖

侍讀臣孫球覆勘

總校官知縣臣繆琪

校對官中書臣王嘉曾

謄錄監生臣蔣翰

欽定四庫全書

忠肅集卷下

啓

上太宰啓

伊尹以斯道覺民無間匹夫匹婦之賤周公以大儒佐
世猶躬三吐三握之勞蓋下常患於難伸時每嗟於易
失脅於位勢之貴則枯槁沉溺魁閹之士寧泯沒而無

宋 傅察 撰

聞奉以諂諛之辭則姦邪讒佞欺負之徒或比周而望
進非有異人之間出孰追前哲之高蹤敢傾固陋之心
仰冀寬明之聽恭惟某官標英玉笈毓秀珠躔酌道德
之淵源探析九流之旨游文章之林府追還三代之風
夙膺密勿之求深協都逾之契高宗之得傳說亶惟休
命之承虞舜之舉臯陶允賴嘉謀之告眷聖神之圖治
掩古昔而論功揚鴻烈而章緝熙邁茂先志練羣臣而
覈名實咸秩大猷翊參萬化之源兼總三公之事盖道

同而志合故言聽而計從正機平衡運四方於指掌之
易立綱陳紀措一世於覆盆之安上以齊七政而理陰
陽下以親百姓而厚風俗內誕敷於文德外焜耀於威
靈囹圄空虛國無一人之獄衣食滋殖家有九年之儲
澤被昆蟲恩及行葦壓月窟而震日域洋溢乎頌聲決
天閭而開地垠薰蒸於和氣矧復頤八紘以收羣逸之
彥闢四門以來八構之英振鷺咸集於西籬白駒無留
於空谷斯蓋君子逢辰之會是為志士惜日之秋如某

者性本顯愚才惟樸邀既狷劣而懦武又遲頓而少文
糞土之牆難被丹青之飾液櫛之木奚施斤斧之工徒
以被服於義方粗知沉潜於大訓枕經挾策終昧淵微
援筆成篇恒慙閎肆逮綴名於下士旋從官於四方精
神耗於簿書歲月浸於齒髮未忍枉繩以追曲何殊却
步以求前安仁自笑於拙艱子雲人譏其落拓方將屏
迹於寬閒之野固已忘心乎名利之場尚念羣賢之彙
征豈惟小善之率錄大為采而細為楠無逃大匠之明

方中矩而員中規盡出洪鈞之播是用躬掃舍人之館
庶幾得升闕里之堂伏望某官振拔寒流提撕後進廣
山藪藏疾之度推江河播潤之仁思刮垢以磨光務取
長而捨短觀道德而聽教誨倘迂一顧之榮悉精銳以
貢忠誠終效萬分之補頌祈之切顛沛於斯

上尚書左丞啓

青蠅附驥可追千里之遊蟠木因人猶為萬乘之器蓋
士必資於汲引而世尤重於薦延敢傾悃悞之私仰瀆

高明之聽伏惟某受姿至陋涉道甚踈學靡究於淵源
文僅成於骫骳進寸退尺誠輶軻而艱難曠日經年猶
棲遲而羈旅將丐齒牙之論孰先左右之容恭惟某官
以瑰偉閑達之才輔深沉直諒之德潛神默記博通百
代之書下筆屬文煥發羣言之蘊謀有益於天下論不
詭於聖人出逢熙洽之朝徧歷高華之選延登廊廟密
貳機衡同寅協恭豈特助成於大化贊元經體固將永
茂於庸功注意甚隆具瞻攸屬矧復高標峙玉雅量澄

波每躬吐握之勤不見喜愠之色拔竒取異賢無在野
之遺校短論長人有逢辰之喜重念某嘗陪下客爰自
弱齡仰盛德而望餘光粗承於訓獎抗塵容而走俗狀
久滯於貧羸倘容漫刺之通許遂曳裾之請披南山之
霧得窺豹變之文運北海之風終假鵬飛之便頌祈之
切顛沛於斯

代向子寶上晉甫啓

青蠅附驥可追千里之遊蟠木因人乃為萬乘之器矧

元禮著龍門之譽而子將更月旦之評榮生一顧之間
義重千金之賜敢冒瀆尊之譴躬修贄見之儀伏惟某
官河嶽降靈圭璋挺質才猷自奮早膺上考之知譽望
日隆益簡淵衷之眷周旋一節出入百為總計漕臺邁
孔桑之籌畫躋榮省戶兼嚴樂之雍容逮均逸於名藩
復究宣於渥澤睠中山之孔道控北敵之咽喉緩帶輕
裘既揚威於沙漠簪筆持橐方還冠於鴈行顧惟朔部
之民久被洪鈞之化陽烏浴海遐邇仰其餘光威鳳棲梧

愚知快於先覩矧在搢紳之列每傾巖石之瞻如某者
孤僻寡徒立身多難蠢愚自信涉世甚踈經學未明竊
有歸耕之志為貧而仕寧辭擊柝之卑青衫皇皇白髮
種種已絕拜風之望敢興躍治之狂雖立叔向之堂一
言莫希於駿蔑然廁王戎之坐三語或效於阮瞻獨憐
匏繫之踪久乏管窺之便會檄書之俯逮整羸馬以欣
奔披雲霧而覩青天倘遂平生之志侍門庭而操紱簞
孰先左右之容敢冀隆謙特承與進醫師待用不廢牛

澠匠石兼收罔遺木屑少借吹噓之譽特推塊土之恩
取斷木於溝中被以文章之飾採孤桐於爨下聆其律
呂之和庶幾一得之愚或有萬分之補

代與宰相免啓

恭承中詔俾總在綱被寵若驚循躬知愧竊以尚書之
司喉舌敷厥訓於四方執政之猶股肱輔乃辟於一體
授不以次官惟其人凡膺載陟之恩必著非常之績伏
念某學粗通於大畧仕徒罄於小忠叨承四近之聯翊

贊萬幾之務曾未酬於尺寸顧荐閱於歲時方責實以圖庸宜在謹訶之數若備員而叙進恐貽明哲之譏已屢布於忱辭冀終回於誤選伏惟某官德尊顯俊仁篤惠疇矜夫難強之才格以至仁之議入告於后倘改命於明廷退省其私尚還充於舊貫豈特安愚不肖之分庶幾愜士大夫之心

代回右丞免啓

肅承詔綽入預政機盛德所臨國有得人之美歡言四

布士知稽古之榮伏惟某官奧學醇師高文應世汲黯
氣節近社稷之臣賈誼才能任公卿之位久藉論思於
禁掖豈徒潤色於皇猷果膺不次之恩益播無窮之問
淵衷虛竚宜亟奉於謀謨海宇具瞻固難從於辭遜

代回中書免啓

顯頒鸞詔榮陟鳳池政本得賢永迪萬邦之乂儒林增
重益昭千載之期伏惟某官才兼四科學舉六藝夙被
聖神之眷徧躋華近之聯委戴胄於中臺殆無其輩任

元超於西省豈藉多人方湏勤翼之謨允洽登庸之望
宜超承於異渥固莫事於撝謙欣聞與議之同祇愧函
封之辱

代回宮使保和免啓

明詔登賢隆名賜寵眡儀近弼載昭體貌之崇均逸真
祠益佇謀猷之告伏惟某官宏才經遠奧學資深聳壑
昂霄共仰絕羣之操盤根錯節屢彰剴劇之能蔚然持
橐之華藉甚端朝之譽書林講藝豈惟典校於秘文經

幄侍言固已密知於清燕茂著非常之績肆頒不次之
恩輿議交孚諒難從於遜避淵衷允屬方嗣慶於褒嘉
代回宮使保和謝啓

秘殿高華寵階政路殊庭優逸名峻使聯欣聞綸綍之
褒胥慰搢紳之望伏惟某官清猷濬發雅量渾深學獨
造於淵源行弗踰乎閭域周旋要劇夙推八座之尊陪
輔燕閒妙簡九重之眷果膺異數允答殊勲鳳穴傳芳
益侈教忠之訓鵠原接武載彰競美之才方共仰於得

賢願永肩於致主莫遑趨慶荐辱惠音荷謙德之有加
激懦衷而增愧

代回宮使保和謝啓

寵傳褒詔增峻榮名接二府之近班總九霄之秘錄伏
惟某官純誠許國通敏濟時遭聖主而遇明君夙慶千
齡之會張英聲而馳妙譽寢登八座之隆密陪清燕之
游屢罄嘉猷之告果頒異渥允協僉俞德並荒墳益動
門闌之喜儀叅機軸更增廊廟之光趨慶未遑移書荐

及感藏徒厚敷叙奚殫

代回大尹保和免啓

異眷酬勲隆名錫寵入亞台司之峻出專京邑之雄伏
惟某官識造幾微學通倫類如張敞之方畧野無枹鼓
之驚若廣漢之聰明里絕鉅簡之訟條教可紀威德並
行聿陞秘殿之華用席洪鈞之拜羣情載穆共欣褒詔
之頒謙德有加遽辱誨函之及罔知承命徒益愧顏

與林仲夔啓

伏審遠揚大旆還指外臺占星駕以非遙謂有披雲之
便望龍門而徒反莫陪躍浪之游愧恨交深惆恍罔措
恭以某官高標應世雅望鎮浮承王謝之風流冠崔盧
之譜系衛玠談道久聞析理之言伯樂空羣共仰知人
之譽如某官者葭莩末契蓬華寒生瞻樂廣之青天每
慙坐井愛趙卿之冬日獨愧覆盆冀因負弩以前驅或
遂望塵而迎拜造叔向之堂下豈無駸茂之一言廁王戎
之座中亦有阮藉之三語變此枯朽之質實繫眄睐之

榮然而見事類獫侯之遲矧復賦性得嵇康之緩自承
攬轡但僕駐車逮聞遵陸道以北旋迺始策疲驂而西
首瞠乎在後歎倪公之登仙瞻之在前慕李君之得御
僅類退飛之鷁空瞻過隙之駒尚冀深仁曲垂善貸佇
明倫之趨召或異日之按行運北海之鵬雖已搏風於
萬里隱南山之豹終期窺管於一斑

回沈狀元啓

伏審唱第楓宸獨擅無雙之譽警書芸閣亟膺不次之

除風采聳聞士夫交慰惟聖神右文之旦復祖宗取士
之科側席求賢既下三年之詔命卿論秀聿來四海之
英比收一戰之功盖有萬人之敵矧入瞻於法座願仰
究於淵題攷象數之指歸極古今之同異老生宿儒之
未覩窮年曠日之難明閣筆相啗默軫才難之慮奏篇
稱善遽興見晚之嗟非持異能曷孚殊渥伏惟狀元學
士清規邁往敏識造微探學海之淵源潛神默記本詞
林之根柢奮筆纂辭望久著於南邦文將傳於上國棘

垣較藝參異等以標名衡石程能冠羣才而稱首嗣聞
天獎親結主知驟從解褐之初荐拜出綸之寵豈特竄
超乎近比方將益播於前芳登文石而陟赤墀佇奉清
閒之對飛翠綏而拖鳴玉遂躋禁近之聯顧此庸虛曾
微雅素周廬寓直幸闕豹於一斑漢陛臚傳驚化鵬之
萬里未遑修慶廼辱惠音披詞采之爛然愧推揚之過
矣

回第二人以次啓

楓宸射策密契清衷桂籍聯名獨標上第國賴多材之
助士歆稽古之榮伏惟某官秉德粹純挺資穎秀洽聞
殫見窮六藝之淵源發藻擣華漱百家之腴潤早著鄉
閭之譽浸騰庠序之聲屬睿主之右文復祖宗之取士
萃此萬人之傑觀夫三道之長諏象數之指歸考古今
之同異老生宿儒之未覩窮年曠日之難明閣筆相嗤
方軫才難之慮奏篇稱善遽興見晚之嗟既留乙夜之
觀遂擢甲科之寵薦圭璋於清廟豈無其人騁驥驟於

長途自茲以始未遑修慶廼辱惠音披文彩之爛然愧
推揚之過矣

回貢元啓

校藝類宮登名天府士夫所慕族黨生輝伏惟慶慰竊
以貢元先輩字量宏深風猷邃雅潛神默記頗通諸家
之書博物洽聞多識前世之載果被賢能之選入陪俊
造之游將攬秀於儒林遂躋榮於要路未遑馳慶先辱
移書荷眷意之甚隆愧感銘之徒厚

回貢士啓

論秀類宮登名天府極一時之遴選為多士之榮觀不
圖盛禮之臨遽辱華箋之貺仰承異眷增激懦衷伏惟
貢元先輩以卓犖兼人之資來遊庠序當文明上賢之
日充賦京師蓋嘗博極於羣書詎止能通於一藝願益
修於器業以大耀於門閭終軍入關誰識棄繻之志買
臣乘傳行看衣錦之榮

問候太宰啓

昨者解官下邑趨調上都循夫子之牆方執掃門之役
開公孫之閣遽叨解褐之榮亦嘗自致於悃誠固已重
蒙於記錄惟中藏於恩遇敢荐瀆於高明東歸而來踰
月於此望風引領雖神爽之並馳寫抱裁絨顧精微之
難盡恭惟某官學舉六藝才兼四科會逢千載之期規
恢萬世之業周公之相王室誕保文武之功伊尹克享
天心咸被堯舜之澤方將詢封禪之事而廣符瑞之應
豈特垂仁義之統而創道德之塗四方所以舞手而傾

心多士孰不伸眉而拭目矧復高懷脫屣雅量澄波每
躬吐握之勤不見喜愠之色拔奇取異賢無在野之遺
校短量長人有逢辰之喜念某蚤緣淺學獲望餘光曾
微毫髮之勞荐荷丘山之賜蒼蠅之飛數步晚企英流
鷓鴣之巢一枝久安愚分但念成葵之遠敢興望蜀之
貪伏望某官東壁分輝洪波借潤得沾升斗之祿少寬
朝夕之憂獻谷永之書誓終酬於厚施草王褒之頌尚
少抒於羣情炎帝司時景風扇物願謹節宣之序益綏

福履之多

問候余少宰啓

伏自一遠門闌屢更歲律抗塵容而走俗狀方謹於官
常仰盛德而望餘光阻陪於賓贊敢冒再生之瀆荐通
咫尺之書恭惟某官學擅儒宗識窮今古夙蘊經綸之
業徧躋華近之聯右轄左綱維持國體西臺東省助理
政機聖賢相逢契千載一隆之遇上下俱欲成三王五
帝之功逮登右揆之崇載陟貳公之峻教化行而習俗

美陰陽調而風雨時謹以無為實輔贊彌縫之莫識守
而勿失蓋典章文物之具存既俾萬國之咸寧豈忍一
夫之不獲矧如孱陋嘗辱品題自比輪囷雖曰不材之
木庶幾踊躍亦為可鑄之金興言及茲陳筆奚益

問候門下侍郎啓

睽離恩館荏苒歲華邈爾台躔飄然蓬跡雖禮絕上下
之分難通瑣瑣之文而身陶埴之中敢致拳拳之意
恭惟挹彼盛福歛此至真均調萬物之和斟酌一元之

氣竊以某官崧高育秀昂宿騰輝量包雲夢之虛才挺
棟梁之用出陪熙運入輔昌期擴帝紘而恢皇綱參冢
宰之重職謀王體而斷國論謨先聖之大猷俗已扇於
淳風民咸躋於壽域益簡宸衷之眷增隆巖石之瞻佇
登拜於上公方誕敷於顯冊顧茲弱植素荷殊私大袖
褒衣列掾曹於東土輕裘緩帶仰顏角之餘光嘗叨薦
鶚之榮每慶登龍之幸逮聞召節還秉化鈞瞻彼青天
悵披雲之無路情同乳燕念厦屋之有歸亟從遠道之

游莫遂掃門之請載惟偉度或未遐遺驂冀北之羣倘
並馳於達路起周南之歎忍自棄於明時願少丐於波
瀾庶永歸於陶冶傾馳之數敷述奚殫

問候承旨啓

昨者調官上國通謁高閎侍君子之令儀已慙於形穢
聽先生之餘論更覺於神開重蒙特達之恩欲假扶搖
之便孤蓬自振遽整駕以言歸大厦方成空溯風而自
抃敢冒等威之間少通悃悞之私恭惟某官昂宿騰輝

崧高毓粹窮六藝之言而知其要摠百家之書而折諸
衷摛為錦繡之文炳若丹書之妙壽王智略可謂無雙
謝琨風流宜居第一自奉北門之召旋躋東閣之榮眷
遇優隆獨被謫仙之目謀謨密勿允符內相之名方將
入登綱轄之司然後即正機衡之任永俾搢紳之列咸
歸陶冶之中重念某曾乏異能粗知嚮道思竭其不肖
之力自托於無能之辭奔走塵埃莫酬素志逡巡歲月
絕望亨塗倘憑國士之知遂接從游之末道古今而譽

盛德雖無補於揄揚披心腹而效愚忠或有中於萬一
瞻依之切顛沛於斯炎帝司時景風扇物願謹節宣之
序益綏福祿之宜

問候徐帥啓

伏自一去台閤十更歲律顧胸臆之約結徒精爽之飛
騰比聆趨覲之音常布陳情之牘臨文軋軋雖殫夢得
之辭奏記翩翩終乏元瑜之美方虞僭瀆自抵譴訶敢
意勞謙尚憐末學特屈巖廊之勢遠貽華袞之言繩窮

匣開如獲瓊瑤之重墨渝紙弊永為篋笥之光眷意甚
隆欣喜何重恭惟某官分輝昴宿毓粹崧高厚德宏才
渾渾然廟堂之器忠言勁節凜凜乎社稷之臣入預政
機出居帥閫善政善教久賴於濟民嘉謨嘉猷方資於
告后果被邁歸之召仍蒙賜告之優紫府珠庭中總列
仙之秘神丹寶篆屈承中旨之頒寵參二府之儀大聳
百僚之望席茲異眷佇協僉俞鳳閣鸞臺登四府之近
弼玄袞赤舄進三事之極班瞻頌之勤顙沛於是杪秋

在候寒露始凝願順履於至和以永綏於純嘏

問候判府資政啓

懇辭留鑰移鎮近藩涓選休辰布宣善教重惟萍迹久
去台躔引領望風喜山川之匪遠馳函寓意愧筆舌之
難周恭以某官德冠生民道嗣前哲崇論宏議陳三皇
之規模麗藻英文漱六藝之芳潤蚤際千齡之運蔚為
百世之師折萬里之衝增重北樞之寄賦四方之政進
參西省之華服勞王家勤功帝籍荐均休於真館屢出

殿於大邦仲華處榮悴之交子文無喜愠之色雍容一
節俯仰十年眷天平之樂郊實畿右之都會威聲所暨
已喧來暮之謠眷渥方隆即奉造歸之詔然後登延於
上宰遂將永輔於明時律應溫風候當溽暑願謹節宣
之序益綏福祿之多

問候祝漕啓

伏念某受材么麼效職卑陬頃逢朱博之駐車竊慕李
膺之執御造叔向之堂下曾乏一言厠王戎之坐中莫

希三語逮茲旋軫亦既淹時坐蒙河潤之恩居切旌搖
之戀敢通咫尺仰布尋常恭惟某官敏識造微清輝映
物桂林擢秀鱣席隆儒佐天府之浩穰分省漕之清切
決獄疑而據古遠駕于張不益賦而用饒近嗤劉李矧
朔方之繁夥實中國之本根久知心計之優增重使華
之寄盖足食足兵而民信故餘財餘力而頌興孟博澄
清方詳求於民瘼弱翁治行已深簡於宸衷佇奉賜環
即躋持橐清和在候趨拜未涯願順節宣益綏福履

問候沈和仲奏計還啓

暎違符采曠然日月之淹延跋旌麾邈爾雲霄之阻敢
冒瀆尊之譴恭修執贄之儀伏以某官杞梓呈材圭璋
挺器德量汪其容物神鋒凜以照人淵源游夏之文潤
飾宏寬之業儒林講道夙推折角之名計省豐財荐被
含香之選眷河北據腹心之地而關西駐貔貅之師方
廣粟以脩邊故乘輅而將指曾恢遊於餘刃果坐富於
斯倉入覲清光密承殊眷雖弱翁治行蓋已深知然孟

博澄清迺其素志逮茲旋軫益振高風佇聞褒詔之頒
遂席近班之峻顧惟弱植乃荷帡幪尼父之秋陽仰邀
末照趙衰之冬日幸假餘光永言匏繫之蹤徒切旌
搖之戀應鍾入律玄冥紀時願順節宣以迎休祉

問候胡少汲啓

自違門仞浸易歲華引領望風徒結搖搖之志馳函寓
意敢修瑣瑣之儀恭惟某官負卓犖兼人之姿蘊經綸
濟時之略學穿六藝而不為章句之陋儒才備衆長而

克勤簿書之細務蚤陪熙運亟據要津振起臺綱姦邪
為之斂衽雍容省戶士交莫不彈冠旋將命於畿西益
騰聲於朝右還登宰屬密贊皇猷雖睿眷甚優方倅近
班之拜顧朔方至重孰分當宁之憂遂參內閣之聯增
重外臺之寄平反禁網人以不寃總領朝權民皆足食
豈特百城之畏慕實為多士之依歸宜褒紉之屢頒諒
賜環之伊適當金風之應律想玉體之安和願謹節宣
益綏福履

賀留守觀文年啓

伏以氣周四序方肇正於天端日紀三元迺大新於歲
始眷時耆德宜擁繁熙恭惟某官勲著鼎彝望高梁棟
謀王體而斷國論蚤密預於政機宣聖德以代天工久
佇登於宰席偃息藩宣之重雍容政化之優順廸春祺
益隆宸眷顧如謗薄最荷殊恩稱栢葉之觴阻趨陪於
下客築沙堤之路願趣輔於明時

代文帥冬至賀監司啓

伏以候律管之葭灰微陽始應書觀臺之雲物衆瑞已
臻惟茲道長之時宜有彙征之吉伏惟某官學窮往古
澤被斯民威稜瞻乎列城德望聞乎多士攷祥視履茂
膺福祿之多登明選公益對褒嘉之寵屬拘羣紱莫造
賓闕延跂使華惟時善頌

代文帥冬至賀知通并謝啓

伏以微陽來復愛景浸長共欣剛長之時宜有彙征之
吉伏惟某官忠誠許國豈弟臨民道與時行仁為己任

方順迪於穀旦宜茂擁於繁禧馳慶未遑移書先辱仰
荷眷存之厚但深感服之私

賀少保生日啓

竊以崧嶽降神肇紀生申之瑞昴精儲祉終成佐漢之
功天方祐於丕平家自鍾於餘慶宜有聖人之偶出為
王者之師誕日載臨輿情共祝伏惟某官望隆人傑學
擅儒宗大冊高文追燕許之手筆崇論宏議陋管晏之
規模雍容四近之聯密勿九重之眷總方畧而一統類

既資弼亮之明安邊境而立功名實賴撫綏之畫方將
誕布於德澤豈特旁暢於威稜勒燕然之山以耀無前
之迹銘昆吾之冶式彰不世之逢遂入覲於王庭並進
登於宰席履茲赤舄長懷几几之安瞻彼南山永峙巖
巖之峻逾郭令之考校與王喬而爭年六代九公未覺
前芳之遠一門萬石允為聖世之光某謬辱提撕方依
挺植稱觴舉壽顧叙慶之無繇引領望風但馳情而不
已

制

擬中書侍郎除少宰制

元首居上運動實賴於股肱大厦方成扶持必資於柱石迺眷守文之重永惟論相之難注意賢賢既疇咨於列辟同心贊贊盍圖任於舊人播告大廷亶孚羣聽具官某謀慮深遠議論通明學足以窮六藝之文而蹈乎大方才足以應萬微之務而勤乎小物卓爾佐王之略凜然憂國之忠入總綱維擅戴劉之美譽出宣條教繼

召杜之遺風淹留十年夷險一致召從近屏入覲明庭
亮節載昭嘉謀屢告逮擢參於政本益增重於邦基鎮
撫四夷莫善陳平之對總領衆職孰踰魏相之能肆迪
前修用推異數進陟文階之峻延登次輔之榮增衍爰
田陪登真食以攄素蘊以慰具瞻於戲君義臣行豈特
將明之助予違汝弼庶幾啓沃之多俾萬物各得其宜
無一夫弗獲其所惟朕以懌其爾之嘉

擬延康殿學士醴泉觀使除中書侍郎制

朕潤飾洪業憂勞天下永惟政事之本一日萬幾而知
人安民惟帝其難之故夙寤晨興罔敢憚息眷求同德
協贊內樞具官某經術詳明足以恢規於治體政事通
達足以深究於物情擢貳中臺遽以憂去均勞於外久
閱歲華勁節高風確乎不拔休聲茂實籍甚一時召置
樞庭未厭輿議用䟽不次之寵俾參西省之華往欽哉
昔唐明皇勞蘇蘇定碩曰方美官闕每欲卿然宰相議遂
無及者朕為卿恨今朕用爾由師錫爾其祇服休命進

賢任能使百官各稱其職而朕之號令罔有弗當則予一人有嘉汝亦有無窮之聞

擬太宰除使相宮使制

調元台鼎進則冠輔弼之聯置使祠庭居則兼將相之重雖勞逸之異用顧寵數而並隆眷時宗工久執魁柄其敦渙號以告治朝某官學該而識明器重而道遠夙蘊經綸之業具殫啓沃之誠忠正無私俾人心之自化默陟有叙致吏職之咸修陰陽調而寒暑平禮樂興而

刑罰措四夷即叙百穀屢豐方恭已以仰成忽引疾而
求去大臣蹇蹇之節雖務於匪躬君子謙謙之光終思
於不伐控章荐却抗志莫回念重遠於儀刑用勉留於
閒燕虎符龍節嚴上將之威容黻衣繡裳視上公之秩
物併推異數用示至懷於戲斯謀斯猷尚無忘於告后
乃文乃武將永賴於憲邦不遐爾心乃稱朕命

擬安武軍節度使守司空開府儀同三司除鎮海
軍節度使守太保開府儀同三司制

公庭論道內參心腹之良將鉞宣威外總爪牙之寄永
懷舊德顯有不功改臨海岱之區載陟台衡之路誕敷
異數用穆僉言具官某學造聖源智先事表師周孔之
芳躅陋管晏之規模密勿嘉謀建萬世之長策雍容近
弼為一代之宗臣頃膺外閫之求併視洪鈞之峻袞衣
赤舄延登鼎足之司豹尾神旗增壯轅門之勢折衝於
枕席之上運籌於帷幄之中施澤異方著勲王室蔽自
朕志酌於輿情揚命明廷膺上公之顯策易節少府鎮

東秦之巨藩眷是威儀之多式副倚毗之重於戲萬邦
為憲吉甫兼文武之資四國于蕃申伯有柔嘉之德其
虔共於爾位毋專美於前修

擬資政學士除鎮海軍節度使制

朕內熙衆志外撫羣黎思並建於豪英以隆巨屏必兼
資於文武乃允具瞻蔽自余衷歷選近列用錫爾祉命
召虎以來宣克壯其猷得方叔之元老肆頒顯號孚吉
治朝某官篤厚而淵深寬容而強直才足以行其所守

智足以尊其所聞遠見識微之明表於近世好學樂道之效著於本朝確然金石之堅卓爾棟梁之用圖事揆策論不詭於聖人履忠進善議有益於天下粵升華於秘殿益流譽於明廷所去見思無施不可盤根錯節嘉其屢試之功大纛高牙授以專征之器惟茲異數允答殊功於戲悅禮樂而敦詩書必有仁者之勇重國家而尊社稷斯盡大臣之能惟終保於令名尚克勤於小物

擬中書舍人除禮部侍郎制

堯命伯夷作秩宗以典三禮周立宗伯和邦國而諧萬
民粵予神考之興酌古經邦之憲分釐庶務肇建六官
惟時貳卿實亞八座居左右侍從之列責任既隆況典
章文物之司疇咨惟審必得明練之士用膺眷寵之私
以爾某通諸家之書識前世之載屢試以事所臨有聲
俾代予言最宜為誥簡古而蔚炳三代以同風忠正無
私知本朝之要務載孚輿議俾佐春官夫禮樂教化之
源文昌政事之本惟爾有政無忝於厥官直哉惟清將

觀於來效

疏

代王彥昭天寧節功德疏

流虹紀瑞實契昌期繇宇傾心敢忘善禱恭投紺苑廣
集縑流閱寶藏之祕文修法筵之淨供庶資妙果仰祝
遐齡伏惟皇帝陛下紹累聖之宏規超百王之盛烈化
行中夏躬大禹之儉勤威憺殊方兼成湯之勇智嘉祥
荐應協氣橫流適臨震夙之辰宜集駢蕃之福伏願洪

基益固熙運寢昌擁諸佛之儲休膺萬靈之荐祉仁如
天覆常綏惠於羣元德並離明永照臨於下國

華渚效祥啓聖神之休運梵宮祈福罄臣子之歡心庶
藉良因仰延遐算伏願二儀並貺百祿是宜基業固於
山河壽考侔於箕翼大恢至治永庇羣生

代周文翰天寧節功德疏

華渚流虹實啓聖神之運祇園供佛庶殫臣子之誠敢
藉良因仰資遐算伏惟皇帝陛下堯仁博施舜智用中

勲業冠乎百王德澤漸於四海非飲食而卑宮室自還
風俗之醇襲冠帶而垂衣裳坐致蠻夷之化屬猗蘭之
慶會動寰宇之懽心投紺苑以乞靈藉緇徒而植福備
蒲塞之妙味閱海藏之秘文式傾葵藿之微少答乾坤
之施伏願衆祥畢集百祿是遒帝業固於山河益恢至
治國壽齊於箕翼永庇黎民

一人有慶適臨載夙之辰萬邦咸休共獻無疆之壽伏
惟皇帝陛下聰明睿智齊聖廣淵尚德緩刑將興堯舜

之道移風易俗比隆成康之時陰陽調而羣生和神靈
應而嘉祥見惟時誕節實契昌期罄草木之微誠修龍
天之法會庶資妙果仰祝遐齡伏願豐茂世之規成長
治之業潛憑勝力坐致殊休如日之升常照臨於下國
與天亡極永覆幬於黎民

代仲都憲天寧節功德疏

上聖誕生允啓星虹之瑞輿情交慶虔修梵釋之因恭
惟皇帝陛下睿哲先天文思稽古丕承眷命孚佑黎元

紹累聖之宏規超百王之盛烈陰陽和而萬物得寒暑
平而三光全肆臨震風之辰宜集駢蕃之福是用即布
金之地閱貫苑之文仰祝遐齡式資妙果伏願三靈墮
祉諸佛儲休天地之化無窮日月之明久照羣生咸遂
常依堯舜之仁百祿是宜益享喬松之壽

電繞樞而虹流渚實開睿聖之祥穡修貢而川效珍共
慶昇平之運敢申善禱仰叩真乘恭惟皇帝陛下玩意
神明勞精政事接千歲之統垂萬世之規冠德百王錄

功五帝肆臨誕節咸罄歡心閱寶藏之秘文修法筵之
淨供庶資良力益集聖因伏願諸佛垂休萬靈荐祉參
天地以施化與日月而齊光賜大禹之書知彛倫之既
叙授黃帝之策宜終始以無窮

代余帥天寧節功德疏

帝乙生商實啓興王之運洛書命禹式昭治世之祥彌
月載臨輿情交慶伏惟皇帝陛下聰明睿智篤實輝光
紹累葉之宏規超百王之盛烈仁沾恩洽俗易風移陰

陽調而羣生和天地順而嘉應降爰屬猗蘭之會敢傾
向日之誠閱寶藏之秘文修祇園之妙供席茲善果仰
集勝因伏願展無窮之勲建不拔之策接千歲之統方
隆過歷之期擁三靈之休益享後天之筭

流虹繞電實開受命之祥膺錄受圖方啓至寧之運邦
家永賴夷夏交歡恭惟皇帝陛下盛德難名豐功莫擬
潤飾祖宗之業槩同虞夏之風務教化而省禁防崇寬
大而長和睦頌聲並作協氣橫流肆臨震夙之辰宜集

駢蕃之祉雖天地之大固無俟於禱祈而葵藿之微自
不忘於傾慕悉延清衆廣設珍羞庶仗法緣益成善果
伏願建久安之勢豐茂世之規雷動風行莫測神功之
大天長地久永膺壽考之寧

降聖節道場開啓疏

寶命有初仰九天之默御真祠如在罄萬國之微誠祇
率多儀悉延淨衆冀神功之莫測祐聖烈以無窮以莫
不增既錫泰元之筴必得其壽益隆長發之祥

降聖節道場罷散疏

昨羅圖於億載慶襲其傳奉玉音於九重祥開是日凜
真游之在上嚴邃館於多方按用靈科恭陳妙果冥冥
默默孰知至道之宗子子孫孫永錫無疆之祉

口號

天寧節前筵口號

大電繞樞實兆軒黃之瑞流星貫昴允符夏禹之祥世
方格於大寧月復丁於盈數邦家永賴夷夏交欣恭惟

皇帝陛下睿哲先天文德稽古建中和之極創道德之
塗三光全而寒暑平上順泰階之政五穀熟而草木茂
下均庶物之休冠德百王錄功五帝屬誕彌之令節頌
燕衍之寵恩舜樂初調見五百年之平治堯階再望慶
八千歲之春秋臣等謬廁伶官獲遊化國輒效華封之
頌願賡擊壤之歌不度荒蕪仰陳口號

天扶寶運世興王慶陋猗蘭入畫堂千載後觀周禮樂
萬邦遥奉舜衣裳北門驕子常輸畫南極老人方效祥

試向紅雲瞻魏闕侍臣應上萬年觴

天寧節後筵口號

上聖誕生允契千齡之運下民底乂方隆萬世之基彌
月載臨普天同慶伏惟皇帝陛下聰明睿智篤實輝光
修德施仁將興堯舜之道移風易俗比隆成康之時百
川理而絡脉通萬化成而瑞應著頌聲並作協氣橫流
賜大禹之書知彝倫之既叙授黃帝之策宜終始之無
窮適當繞電之辰咸錫需雲之宴臣等叨居樂部獲遂

嬉遊葵藿有知終不忘於向慕天地甚大固莫效於形
容輒採民謠仰陳口號

流虹啓聖際千年湛露洪恩下九天騰踏歡聲來擊壤
氤氲瑞色散飛煙已賡聖代中和頌更草前賢封禪篇
四海豈知蒙帝力春臺此日倍熙然

天寧節馬前口號

一人有慶適當載夙之辰萬邦咸休共獻無疆之壽既
集薰修之祉方陳燕衍之儀願抒歡謠少傳畫轂

千秋從昔慶嘉名四海而今賀太平
十里旌旗明曉色萬家絃管被新聲
五雲已逐陽烏現百獸方隨儀鳳鳴
更喜簪紳趨燕衍南山祝聖願同傾

送杜守口號

九重丹詔錫恩榮
嫋嫋秋風卷旆旌
藉甚搢紳爭頌德
爛然衣錦得徐行
一錢選受羣翁送
三徑歸來萬事輕
宣室異時思賈傅
蒲輪應復召枚生

致語

虞憲按樂致語

君臣相悅方均四海之休天地同和自得五音之正先
京師而首善頒郡邑以承流雖立度出均蓋本一獲之
制而放鄭近雅更資八使之詢暫駐輶車廣陳燕豆恭
惟提刑朝奉才周庶事智探微幾博通諸家之書多識
前世之載久被使華之選樂茲民俗之淳况祇奉於絲
綸方協比於律呂周郎顧曲終節奏以無差季子觀風
識鏗鏘之盡美但某等叨居樂部獲造華筵敢抒千里

之情用贊上天之德

熙然嘉運慶當千初見簫韶被管絃
況際輶車臨樂國更張綺席會羣仙
歡聲已逐鏗鏘奏和氣方隨律呂宣
何日九重頒召節好從鵷鷺聽鈞天

傅倅請杜守樂語

璧日南訛適應清和之候鈴齋卧治況當暇豫之時思
欵奉於談鋒爰廣陳於燕豆恭惟某官精忠許國厚德
臨民家傳王謝之風流文挾班揚之麗藻三年布政四

境蒙休雖獄市并容類曾參之清淨而米鹽靡密兼黃
霸之聰明野無桴鼓之驚里絕鉦笛之訟某官義篤婚
姻之好志同交友之仁欣王化之旁流知輿情之安堵
方退食自公之暇實薰風解愠之時絲管喧闐溢歡聲
於天外尊壘傾倒決和氣於座中某等猥以賤工章逢
高會欲侑一時之樂敢賡五袴之詞

清時樂事昔難逢曦御初移晝景融麥秀兩岐翻翠浪
槐陰四面舞輕風揮餘玉塵談無倦醉倒金壘酒屢空

髣髴已聞頒鳳詔朝來喜氣滿城中

上梁文

槐堂上梁文

兒郎偉淄右接東秦之粵治中分半刺之權昔我魏王
嘗涖茲宇作堂其左以為燕息之居植槐於庭斯見公
侯之志逮歲月之浸久顧牆壁之將頽惟召公之憩甘
棠尚蔽芾而勿伐而宣子之譽嘉木亦封殖以無忘矧
盛德之始臨豈成規之可替通判朝奉卓犖有君子之

操慷慨慕古人之為用其道而行其言孰謂風流之遠
思其人而至其室如聞謦欬之音因斯人之暇時命羣
工而偕作斤斧既集鬱若雲屯柱礎方陳梁如星布增
其故祉易以瓌材載闢重簷肇新彩制虹梁偃蹇抗大
厦以眈眈霜幹扶疎儼前除之翼翼豈特盛一時之壯
觀固已決千里之歡心落此奇功播於輿誦

兒郎偉拋梁東百堵皆興指顧中畫棟飛雲明曉日槐
枝當戶揖春風

兒郎偉拋梁西宮堯魏闕與天齊政成祇恐歸丹禁詔
下爭先看紫泥

兒郎偉拋梁南吳越王孫擅美談他日故鄉夸錦繡方
今重屋見梗楠

兒郎偉拋梁北退食委蛇歌正直清如朔雪映冰壺惠
若冬曦照鄉國

兒郎偉拋梁上魏王精爽應未往仰瞻星斗近華楹遠
揖峯巒歸翠幌

兒郎偉拋梁下却倚庭柯看擺經羣儒誰記舊升堂故老亦知來賀厦

伏願上梁之後民情和悅歲事順成野無桴鼓之驚里絕鉅簫之訟嬉遊燕衍常瞻樂國之風富貴功名終繼前賢之美

疏文

玉佛殿祈雨文

自夏迄今常暘為沴晚苗未立宿麥已空咸懷溝壑之

欽定四庫全書

憂豈復倉箱之望靡神不舉既牲幣之屢陳謂天蓋高
曾精誠之罔答載稽衆志仰叩覺慈閱海藏之秘文備
蒲塞之盛饌庶資妙果密致殊祥況千百億身散金光
於普率而三十二相現玉質之端嚴意將大濟於此方
忍使含生之無愬願回威德俯鑒歸依霈膏澤於崇朝
蔚新禾於長畝在諸佛有反掌之易俾千里有鼓腹之
娛是大因緣敢忘報稱

道觀祈晴文

秋陽既升方歛其實雨霖不止將害其成仰妙道之何
言閔斯民之無罪陰雲解駁俾山川之糞除白日顯行
庶禾黍之堅粟

寺院祈晴文

八月其獲念百穀之向成三日為霖瞻重雲之未解式
陳淨供仰叩祇園曰暘而暘常開闢之自我匪且有且
惟祈禱之必從願垂無碍之慈終俾有年之暘

祈晴文

秋穀既登咸有倉箱之望霖雨方作害於場圃之功願
抒杲杲之光終得穰穰之慶齋心以禱拭目而需

道觀謝雨文

常暘為災下民告病竭誠以禱上帝降衷油雲朝興膏
雨暮集俾滂沱矣靡煩離畢之占汜布獲之方同甘露
之澤興含生於將槁欣厥壤之可游賜被無窮功歸不
測尚希終惠無使後艱以報以祈載欣載躍

寺院謝雨文

神智無方奚遠弗屆覺慈不倦有感必通眷被千里之
民罹茲半歲之旱微誠屢瀆嘉應荐臻大興法雲密灑
甘露羣生改色方觀黍稌之多協氣橫流尚俾倉箱之
積載嚴淨供式款祇園永惟解脫之恩莫效毫釐之報

寺觀謝晴文

比以雨淫懼為民害叩真祠而荐懇集淨衆以乞靈惟
天鑒之不違果陰氛之頓釋曦光委照歲事善收祇率
常儀仰酬顯貺

謝雨文

暎其乾矣方懷卒歲之憂雨以潤之遽起有秋之望自
匪覺慈之無碍孰昭誠悃之有加驅沴氣於一朝溢歡
聲於萬室式陳妙供少答殊私

謝晴文

八月其獲欣萬寶之向成三日為霖瞻重陰之未解方
涓穀旦庶歟祇園仰惟無碍之慈俯察有生之願精意
所格居無備物之儀屯雲頓除遂協豐年之慶式陳淨

供少謝洪恩

祝文

諸廟祈晴文

刺史不德不能導迎善氣以協雨暘之叙乃自春夏旱
暵為灾刺史竭精誠潔牲幣奔走請命於爾神蒙神之
休賜以膏澤今禾黍在野蔚然垂實農夫欣欣望歲朝
夕而繁雲蔚興淫雨不止旬日之間又將告病是用祇
懼再款靈宇夫能濟旱於崇朝則劃雲陰於指顧為可

冀也能興多稔於未立則成豐年於將獲為至易也若夫惠於其初而敗之於其終是又非神之意也嘉肴旨酒惟以告哀

諸廟祈晴文

既擇日將禱先祈一日晴遂改前詞云

秋陽既升將歛其實霖雨不止懼害於成初涓選於休辰方潔齋而待事匪且有且雖至誠之必從曰暘而暘惟神功之莫識罔假杳盛之薦載欣未忝之登祇率常儀仰酬洪施

祈晴祝文

六月之旱神既膏之八月之霖神既暎之殆今載穫歲
得中熟而繁雲蔚然穡人塗足神之聰明亦何惜十日
之霽而為一簣之虧也願止其淫終此大惠

諸廟謝雨文

我瞻此邦農服鉏耨昀原隰相錯如繡自我初至適
罹旱暵閔閔累月如垢未盥奔走請命昭此誠悃惠澤
滂沱無有遠近始時下田溉以行潦助長握苗半亦就

稿十日不雨存者電掃今者既優實堅實好洋洋千里
老稚歡舞庶幾有秋蘇我貧窶吏則不德神施其普不
腆之儀尚歆毋吐

諸廟謝雨文

間者常暘害於歲事奔走羣祀靡敢怠遑逮茲再旬乃
獲嘉應油雲蔚興甘雨既渥枯槁茂遂疾癘訖除僮無
後艱猶冀中熟是用齋戒仰謝洪施牲酒潔豐尚其監
茲

諸廟謝晴文

屬者旱暵為灾刺史奔走潔牲幣請命於明神蒙神之
休賜以膏澤曾未踰月而禾黍蔚然歲且大熟乃旬日
以來淫雨頻止大懼不能終神賜而害於斯民是用齋
心撰事以須良辰恭歛靈宇而仰祈孚祐精意潛通先
期獲吉癸丑之夕清風時興雲陰卷除甲寅之旦白日
顯行萬物皞皞豈特民有多黍之喜吏無失職之憂神
亦永食於此邦無愧旨酒嘉實易祈為報惟神其監之

諸廟謝晴文

民有疾癘吏達其治天有雨暘神請其賜各修乃事食
則無愧淫雨為灾莫嘆我場既禱以霽四野洋洋嘉粟
旨酒尚其降康

代鮑欽止秋賽文

煌煌華堂神所司兮兆祥佑福民所祇兮風馬雲車騁
驚螭兮來饗來臨聽甚卑兮我吏于茲亦何為兮旱則
渴雨雨求曦兮再三之瀆宜罪罹兮惟神聰明不我庇

兮秋風蕭蕭白露滋兮多稼盈野積如坻兮擊壤欣欣
舞耄倪兮王事供給及我私兮吏安厥職退委蛇兮孰
尸其功神是毗兮肴酒芬香侑以詩兮匪以為報唯其
儀兮

青詞

代鮑欽止祈雨青詞

臣罪廢之餘受天子之命假守是邦夙夜寅畏所以稱
明詔惠元元者未有一得而顧瞻原野則苗之茁者曾

不數寸農夫之倚耒者種猶未入也嗚呼天之徧覆施
育羣生其忍使至此耶今山川望祀既已屢走吁嗟之
求辭亦窮矣臣又初至未能有以協媚於上下而溝壑
之憂近在旦夕是用齋戒為壇請命於上帝庶幾愍茲
分敕百神大沛膏澤永為民休其自今尚克力職以謝
洪庥也

又祈雨青詞

天維顯思常監觀而從欲心亦憂止敢齋戒以求哀念

千里之何辜歷三時之不雨秋種未入而室有閒民夏
苗將枯而野無長穗紅塵蓬勃赤日蘊隆吁嗟之詞既
窮山川之望咸舉雖密雲屢布終閔澤於崇朝顧高廩
方陳懼流災於凶歲仰瀆蓋高之聽冀垂徧覆之恩召
屏翳以先驅呼豐隆而作解既優既渥將遂及於我私
無臭無聲亦何知於帝力

祈雨青詞

愆陽為災歷春不雨農夫告病田畝將空既率循於舊

章屢奔走於羣望豈積誠之至未能感神抑水旱之來
實為有數敢請下民之命仰叩上天之仁冀蒙監觀昭
其誠悃庸寸之合亟召呼於羣龍三日之霖遂沛澤於
萬宇

謝雨青詞

天道無私常監觀而從願民情所病敢齋戒以薦誠惟
茲旱災害於歲事雖舊章具舉並走山川之詞而沴氣
方隆未協雨暘之叙恭陳悃悃上瀆蒼穹果精意之潛

通致嘉祥之來應錫以崇朝之澤寬其終歲之勤百穀
用成行有倉箱之積三事就緒遂無溝壑之憂

代作夫人平安醮青詞

竊以道運無積孰窺覆載之方福生有基蓋本精神之
薦繫九天之默御庶一念之潛通臣妾某氏性植久荒
心源未淪素昧冲虛之旨每稀清淨之風願宗族之康
寧實神靈之敷施敢陳妙供恭按仙科載稽玉笈之文
並集丹臺之衆仰祈冲鑒俯諒微衷洗千劫之塵緣永

酬素願祇一門之善蔭俾免後艱

代杜守病設醮青詞

陽舒陰慘常福善而禍淫雨施雲行每赦過而宥罪輒
輸悃悞仰叩威靈伏念臣素稟尪羸之姿來忝承宣之
寄方詔條之數下愧善最之茂聞筋力外竭於簿書精
神內耗於思慮遂失節宣之序不知疾病之嬰伏枕彌
旬沉痾被體皆緣積戾自致深憂惡石屢攻未有毫釐
之驗誠心所感尚祈覆幬之恩伏願貫其已往之愆開

以自新之路庶俾膏肓之厲少寬溝壑之虞雖履地戴
天固難施於報效然生死骨肉敢復蹈於悔尤

叙

唐宰相蕭嵩會百官賦詩叙

雅頌不作久矣蓋自先王之道衰而禮樂之用熄兩漢
而下固有願治之主勵精庶政垂意元元僅能濟一世
於安平而教化未盡治刑罰未盡措民氣未盡樂儒臣
學士雖欲髣髴至治聲歌太和以耀後代而垂無窮然

辭侈事陋不足感人心況能參諸詩書而無愧乎此有志之士所以拊髀而屢歎也我唐之興高祖應天順人混一宇宙以創大業太宗修飭百度攝服四夷以興太平高宗中宗嗣守洪基以含以容至於睿考掃除蠹孽輯寧邦家巍巍乎中興之功矣盛德不居以授聖子恭惟開元神武皇帝陛下既受羣臣朝慨然長慮欲復貞觀之烈以追三代之隆躬孝弟示節儉攘散險詖之聚廣開衆正之門眷求賢良列於庶位二十年之間剔陋

補弊滌瑕燭幽凡前世所睥睨而莫能為者舉而行之
固有遺策德教加於百姓威靈行乎鬼區囹圄空虛休
祥畢至封人之祝擊壤之歌洋洋乎盈耳書契以來未
之有也於是天子覩海內之少事嘉斯人之咸樂詔曰
朕承洪業託位公侯之上夙興夜寐以迄於茲雖賴天
地祖宗之靈貽休垂慶亦惟爾左右侍從百執事之臣
竭心悉力協成丕功予惟寵嘉之夫始則同其憂終則
同其樂先王之盛德也詩不云乎太平之君子至誠樂

與賢者共之其賜羣臣十日一宴以彰至治之效焉臣
嵩等既受詔退伏念昔者周宣王能修文武成康之業
天下復興而方叔吉甫召穆公之徒猶能為雲漢崧高
烝民韓奕江漢常武以揚王休傳之無極至於今頌之
況如今日之懿而喑無詩歌是不接邦人之意而忘天
保報上之義也乃會羣臣賦天成元澤維南有山揚之
華三月英英有蘭風和嘉禾等詩凡八篇溫純深潤遠
繼雅頌之體既又命臣述序其所以然臣幸生聖世待

罪闕下涵泳太平之澤久矣竊美相臣之意而侈上之
賜思得掛名其間有榮耀焉宜俾夫萬世之下咸知君
臣相與之樂而八篇之作不特為虛辭借美以夸示一
時而止也於是乎書

銘

進善旌銘

昔在帝堯俊德光被舍已從人旁搜俊乂顧瞻在廷既
悉汝意九叙惟歌從欲以治帝曰欽哉我其敢忽咨汝

萬方以誠自竭先民有言詢於芻牧小人之箴亦莫敢
伏愚者千慮則必有獲狂夫之言聖人所擇譬彼岱宗
天下所仰塊土積塵增高其人又如天池百川所歸涓
流零露受而不辭乃詔有司建以析羽於彼達道咸使
觀覩有善則告立於其所予弼予規不汝違拒凡茲有
衆小大相數明明天子惟德是樂予予干旌茲迪攸教
豈無嘉謀庸以相效若輻之湊若水之赴潤色增光靡
異細鉅庶言既同事無遺策誰其尸之天子之澤

玉漏銘

陰陽之運密移莫測孰司其機以其準則設壺下漏登
時進刻差之毫釐其失則百於皇我王神智自天取成
於心罔襲以沿瞻彼銅壺其流涓涓久而必塞理則宜
然乃詔內府載選良璞迺敕工人是追是琢不日告成
陋彼衆作溫潤而澤縝密以栗引水注之晝夜不息晦
明寒暑罔有差忒昔在成周百物咸脩曰挈壺氏世掌
爾器及政之衰官怠其事東方未明詩人是刺於皇我

王既飭庶治以其遺餘肇新厥制永永萬年自今其始
下臣作銘以昭盛美

策問

昔漢武帝選用豪俊征伐四夷當時號為名將如衛青
霍去病蓋其尤也青雖善士然於天下未有所稱去病
有氣敢往然少而侍中貴不省事是二子者才氣優劣
果如何耶至於將數十萬之衆深入虜庭奮揚威武功
烈可謂盛矣攷之於書其行軍用師之道所以料敵制

勝者亦可論乎諸君試脩陳之

昔光武以英偉之姿掃除禍亂中興漢室雖其天命人心所歸非可以力制而當時豪杰之士咸依日月之光奮身不顧共濟大業顯名夷夏著勲竹帛使後世之君思其人而不得則法其容貌書其官爵列為名世之圖蓋二十有八人攷之史冊方畧謀慮見於已試必有可以為師法者諸生深明兵家之事多識前古之宜講論於此當已熟矣願併與其優劣著之

周官曰險野人為主易野車為主夫用車以戰三代之制也晉公申巫臣教吳以車戰而楚人疲於奔命則行師之法孰若車之利哉逮至後世其法浸廢然亦間有用者以近古觀之唐馬燧用於河東而兵威大振房琯用於陳濤而師徒敗用車戰一也或以勝或以敗何也豈用之有巧拙而地勢有利不利歟先王車御之法載於方冊諸君講之詳矣願併陳之

昔司馬遷班固咸以博學多文探纂前記綴緝所聞成

一家書後之稱良史未有不宗焉者也今其書具在學者論之熟矣敢問向之稱遷曰辯而不華質而不俚其文直其事核不虛美不隱惡矐之稱固則曰不激說不抑抗贍而不穢詳而有體二子之言非苟然也試撫其書舉其一二明之

自古名將如漢李陵以步卒五千出居延至浚稽山卒遇敗衄身降匈奴唐李靖以勁騎三千由馬支趨惡湯嶺遂破定襄襲走可汗夫以寡敵衆一也或以成功或

以敗豈陵之用衆不若靖耶抑其乘機應變有未得耶
不然則天時地勢有利不利耶諸生試詳論之

黃帝堯舜之治二三子所飽聞而樂道者也敢問易曰
黃帝堯舜垂衣裳而天下治語曰無為而治者其舜也
與莊子曰堯之治天下不賞而民勸不罰而民畏夫既
曰垂衣裳而治矣無為而治矣不賞罰而治矣則內經所
載二典所書太史所記何其詳且悉耶至漢晁錯又謂
五帝其臣莫及故身親其事三王臣主俱賢故合謀相

輔五伯不及其臣故屬之以國任之以事信斯言也是
帝者反勞而伯者反逸矣盍詳論以質所疑

劉向班固皆漢儒宗其論當世之士非苟云而已也然
向稱賈誼通達國體雖古伊管未能遠過而固以為術
已疏向稱董仲舒有王佐之才雖伊呂無以加管晏之
屬殆不及而固以其言為固矣誼仲舒於伊尹呂尚信
不侔矣使時見用功烈之盛管仲晏子其獨不足為歟
至固論孔子後命世之士唯孟軻荀況董仲舒司馬遷

劉向揚雄而獨不及賈誼且孟軻優入聖域者也荀況揚雄大醇而小疵者也若遷仲舒則於誼果何如耶諸生談經之暇博及羣書願聞所論以質厥疑

闕楊墨之羣邪以尊孔子之道者孟軻氏之功也非惠施之舛駁以明老子之道者莊周之功也夫軻與周生同時也辯相若也然軻之書十四篇未嘗一及於周周之書三十三篇未嘗一及於軻豈道不同不相為謀耶抑相忘於道術耶竊疑其所以然願與諸生論之

祭文

代祭林子中文

嗚呼士之逢辰病不已修名聞既彰位則非尤雖躋顯榮有不壽考鮮或皤皤為國之老位與壽隆視其後嗣有子弗賢孰大以熾凡此三者搢紳之榮人艱其一惟公是并公之先世載其令德力田而牟黍稷嶷嶷伯氏仲氏有公有卿公居其間濯濯其英行也無瑕學則純師歷仕五朝左右其宜翔乎中外晚登仕從嘉績藹然

播在輿誦衆方汲汲誰克知止公獨慨然曰予可已請
命於朝板輿就養拔其忠節老而益壯高門煌煌蘭玉
盈室綵服趨庭天子之弼嗚呼哀哉病始上聞國醫往
視尚冀安寧胡不憇遺老臣云亡天子興嗟仁者必壽
七十胡遐駢繁贈賻追責窀穸往者何憾存者弔感嗚
呼哀哉某頃以姻婭獲披雲霧汗泗往來數奉杖几方
與士夫引領南望冀公與子同歸廟堂日月幾何公仆
不作山川匪遙庾吏是縛莫不舉觴葬不執紼寓哀以

詞流涕永訣嗚呼哀哉

任子諒母夫人祭文

夫人生有懿行嬪於德門守義靡他蚤勵共姜之志擇
隣成教遠追孟母之風惟積善之有餘故流芳而甚遠
眷時賢嗣為世名臣奉以安輿居享承顏之樂新其命
服屢膺錫號之榮方歆五福之全遽起九泉之歎升堂
而拜念託契之實深執紼以前悵修途之云阻聊陳薄
奠用致微誠

挽詞

毛彥謨以其弟彥周出殯見索挽詞謹賦一首

十年鄉俊嘆蹉跎一日皇恩盡網羅別去謂宜登上第
歸來還復遇沉疴秋風但結原鵠恨曉露空聞蒿里歌
榮願未酬身已歿平生稽古竟如何

挽詞二首

仙李遺風遠高門積慶長及身儀禁路有子耀巖廊不
及千鍾樂應留八葉昌淒涼封密印髣髴映金章

故里尊疏傅羣公慶孟侯方歆五福脩遽隔九原幽歎
息人何贖褒榮禮獨優翻疑脫仙骨名字照丹丘

又挽詞三首

蕭葉蟠根大于門結駟新鷄行尊几杖鶴骨離風塵追
挽傾朝綬褒榮動帝宸惟應兩河道猶想錦衣春

遺子一經足成家五福并千鍾欣樂養萬石仰榮名日
射明旌字風傳袞鐸聲遙知開吉地不假問三生

榆社聆風遠蘭階托契深興宗知有自處貴獨無心隴

栢晞朝露庭槐長夏陰如公更何恨顧我尚沾襟

墓誌

宋故朝散郎尚書吏部員外郎贈徽猷閣待制傅

公行狀

公諱察字公晦孟州濟原人曾祖某故仕山南東道
節度推官知磁州昭德縣事贈太子太師曾祖母王氏
昌國太夫人祖某故仕通直郎知京兆府奉天縣事
贈正議大夫祖母張氏贈碩人父現任朝議大夫主管

南京鴻慶宮母錢氏封恭人公以元祐四年己巳十一月十六日生是日伯祖獻簡公拜中書侍郎因小字鳳郎生而秀穎異他兒公尤愛之十歲不戲弄誦書問學晨夕不懈年十七舉進士以父任衛州幕官屢試河北路轉運司高預薦名逮試禮部以避親送別試所復在高選是時蔡京初輔政用事其徒日以杜絕諫諍誅勦忠良為事引羣兇者謂之明國是或擢為第一或置在甲科公守正論不復得在高等公之未廷試也京方賣

弄威權脅制內外且陽示含容誘以附已堅欲以女妻公遣其子儵與術士協律郎趙知幾等數輩踵至視公又托其姻戚強公相見公毅然不肯從有識者謂公少年有器識未易量也其後公為清憲趙公壻京銜之清憲公薨其家陳乞添差青州司法參軍前執政官徐處仁余深繼守青州徐長於治民屢試以事知其奉公不苟心器重之深亦待以老成就移文林郎知治州永年縣丞在職清謹惠愛及民民到於今稱之移儒林郎部

使者交章論薦改通直郎知淄川縣丞淄川東州佳郡
士大夫之賢者有如衡規王積中毛申之皆領宮祠於
彼公迎親至官所時朝議公方提點南康軍逍遙觀公
創築堂以逍遙榜之朝議公日與三人者游賦詩飲酒
相得甚歡公奉溫清供甘旨於其間怡然自得未嘗以
仕宦屑意清憲公三子皆有賢德以母夫人高年家居
不仕講學博古琴書自娛友壻李擢少負英才時為青
州司錄公緣職事往來淄青間相與琢磨士論稱之及

終不肯造朝居無何除通判萊州改順安軍皆不赴又
除太常博士久之召對除兵部員外郎逾年遷吏部主
管最號煩劇在職者主畫諾而已公取案牘躬為省閱
每至申刻方得歸日以為常是以咸悅出入望之人皆
以手加額焉宣和七年乙巳十月僭宗正少卿接伴大
金國賀正旦大使時年三十有七十一月至燕山府聞
金人將南下而帥臣蔡靖但言使人在途恐變起倉卒
即以書抵其家具道金人欲南下之故且曰藥師忠勇

可恃以無憂是月二十一日至薊州玉田縣韓城鎮使人無來期後數日敵騎暴至夜圍韓城鎮明旦有部長從數十騎突入館曰請少卿上馬公飲以酒問之覺其有變不得已與副使蔣璽上馬行至界首立馬以待部長促行公曰此兩朝疆境尚欲奚往耶部長輒指畫易御者望東北去約行百餘里過青州金國太子領兵數萬騎南向遇諸塗使副行李人從官屬禮物悉皆被掩左右請公拜太子公曰某奉朝命至境上迓使人不至

國中不見國主不應拜太子太子雖貴尚合與使人賓
禮相見太子曰金國方興師問罪海上之盟不復可守
尚何使人之稱耶大厲聲而言者久之大抵瀆慢之語
也又曰張角我讎人乃與高官今安在而以偽首級見
欺又曰凡汝國中失德及向我不善意為我悉陳之我
將富貴汝公曰張角事實不聞但主上仁聖兩朝方
結好信使接踵於道禮聘未嘗闕而太子盛怒如此某
所未曉容某還朝奏知又曰汝尚欲還朝耶白及如林

堅欲公拜雖衣冠狼藉而膝終不屈且曰事至今日不
過一死某死即不敢惜拜即不當拜反覆辯論殆移三
時太子乃曰勿令他拜汝後欲拜我不可得矣日已晚
公與蔣璽及一行使臣退就一所公顧蔣璽曰蔡靖圻
候不明以至於此朝廷不知邊鄙無備奈何又謂書表
官秉義郎侯彥等曰我死誠不惜但不曾與朝廷了得
一事又我父母年皆六十餘平生鍾愛我不敢辱命
汝等得脫必記我言言畢一行皆掩泣左右敵人多竊

聽者暮夜分隸數處自是官吏不復得相見十二月七日敵騎次燕山藥師奮兵迎擊殺傷甚衆已而再戰即遽降金開門延入燕山遂失守明日侯彥等聞金人相與言曰昨日大使在軍中望見藥師戰勝有喜色慮藥師刼取已殺矣既而太子召燕山將官武漢英囑之漢英選虎翼卒沙立等三人焚化裹其骨間關至涿州獨沙立在遇金人收繫土室兩月餘一日伺守者不在即毀垣而出是時宋伯友奉使過界上隨之得還以靖康

元年五月至京師朝議公時為屯田郎迎置明聖觀音
院設水陸大會殮之遣公之弟護送歸濟源權厝資忠
崇慶院即賜憲簡公守墳佛廬也先是蔣噩武漢英及
國信目使人多竄歸者人人誦公之言高公之節而侯
彥等不忍使公湮沒無聞乃錄其實狀聞於朝大名府
路安撫使徐處仁河北路轉運副使孫紹遠皆露章奏
之諫官亦為論列淵聖臨朝咨美後因金使王洵奏事
嘗詰問焉詔贈公徽猷閣待制依所贈與致仕遺表恩

澤仍給賻贈中書舍人譚世勛行其詞曰死有重於秦
山或輕於鴻毛顧所處如何耳苟激於忠義雖死猶生
也朝廷贈襚之典非特為九泉之光亦俾仗節死難之
士知所勉焉某詳瞻之學敏而能通端亮之操靜而能
守為郎華省煜有休問比以一介之使馳不測之險臨
以白刃毅然不屈卒以身殉於義得矣延閣次對厥合
妙選表厥里第以旌高節噫富貴無能磨滅誰記而爾
所立千古不沒庶幾英矣歆我龍光公積階官至朝散

郎娶趙氏封安人男女五人皆趙出自強用外祖遺表
補將仕郎自得自修並承務郎長女許嫁承事郎趙悰
次最幼公忠孝得於天資刻意好學自少及壯未嘗一
日輒廢平生無子弟過初遊場屋同舍或出入飲博客
至公獨在初未為異後至每如此人方嘆其修謹與人
交未嘗見其忤色喜屬文多為人稱許士譽藉甚往往
以公輔期之孰謂天奪之遽且酷也嗚呼自金兵南下
公首以不屈遇害方是時行路之人莫不相與咨嗟流

涕天下想望其風采以為秋霜夏日不可狎玩雖敵國亦稱為忠臣其後李若水以不屈死餘無得而稱者公之歿三年矣骨雖歸而葬未有期朝議公慮歲月久行實零落孤忠勁節沒世無聞則重為不幸一日出諸人奏檢以示公休俾詮次其事以待他日紀述者得考覈焉公休與公為姻家識公為最詳不敢以不敏辭謹狀建炎二年十月從事郎前隆德府司士曹事晁公休狀

忠肅集卷下